



سيارن اخبار  
PRESS RELEASE

KEMENTERIAN KESIHATAN • Jalan Menteri Besar, Bandar Seri Begawan BB3910, Negara Brunei Darussalam.  
Tel: 2381640 samb./ext. 7734 • Faks/Fax: 2383016 • E-mel/E-mail: prohealth@brunet.bn

SIARAN AKHBAR 

## KENYATAAN MEDIA

### PENGURANGAN LANGKAH-LANGKAH PENJARAKAN SOSIAL

### YANG DIAMBIL

### BERIKUTAN SITUASI COVID-19

### DI NEGARA BRUNEI DARUSSALAM

22 Zulhijjah 1441 / 13 Ogos 2020

1. Kementerian Kesihatan ingin memaklumkan kepada orang ramai bahawa pada hari ini, Khamis, 22 Zulhijjah 1441H bersamaan 13 Ogos 2020M, Alhamdulillah dengan izin Allah Subhanahu Wa Ta'Ala jua, **tidak ada kes baru** jangkitan COVID-19 telah disahkan di negara ini. Ini bermakna **jumlah keseluruhan kes COVID-19** di negara ini kekal seramai 142 orang manakala jumlah kes yang telah sembuh ialah seramai 138 orang.
2. Sementara itu, 1 kes yang sedang dirawat di Pusat Pengasingan Kebangsaan adalah dalam keadaan stabil. Manakala, 13 orang kontek kepada kes 142 yang sedang menjalani arahan kurantin (*quarantine order*) di pusat-pusat pemantauan yang disediakan

oleh Kerajaan juga berada dalam keadaan sihat dan tidak mempunyai sebarang tanda-tanda jangkitan. Di samping itu, seramai **726** orang sedang menjalani pengasingan diri mandatori di pusat-pusat pemantauan yang disediakan oleh Kerajaan iaitu mereka yang baru tiba ke negara ini setelah melakukan perjalanan dari luar negara. Setakat ini, seramai **4,128** orang telah menamatkan pengasingan diri mandatori di kemudahan-kemudahan berkenaan.

3. Dalam tempoh 24 jam yang lalu, sebanyak 1,098 sampel telah diuji bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada 45,835 ujian. Sehubungan dengan ini, sukacita dimaklumkan bahawa kesemua 90 penumpang yang berada dalam penerbangan BI874 pada 05 Ogos 2020 bersama Kes 142 telah disahkan negatif bagi ujian SARS-CoV-2.
4. Seterusnya, mengambilkira situasi COVID-19 di Negara Brunei Darussalam yang pada masa ini adalah dalam keadaan yang terkawal, maka pada menjunjung titah perkenan Kebawah Duli

Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Kementerian Kesihatan ingin memaklumkan kepada orang ramai mengenai **tambahan** pengurangan langkah-langkah penjarakan sosial yang akan bermula pada **hari Isnin, 17 Ogos 2020** seperti berikut:

- a. Menaikkan arked dan taman permainan kanak-kanak (*indoor and outdoor*) dari tahap pertama (level 1) ke tahap kedua (level 2).
- b. Menaikkan dari tahap kedua (level 2) ke tahap ketiga (level 3) bagi aktiviti-aktiviti berikut:
  - Kolam renang
  - Panggung wayang
  - Pusat kegiatan warga emas
  - Perkumpulan ramai
- c. Mengekalkan aktiviti Kafe Internet di tahap ketiga (level 3)

- d. Menaikkan dari tahap ketiga (level 3) ke tahap keempat (level 4) bagi aktiviti-aktiviti berikut:
- Kelas berkeperluan khas
  - Pusat penjagaan kanak-kanak
  - Muzium, galeri dan perpustakaan
- e. Mengekalkan aktiviti-aktiviti berikut di tahap keempat (level 4):
- Masjid, surau dan balai-balai ibadat
  - Tempat-tempat ibadat selain masjid dan surau
  - Sekolah
  - Pendidikan teknikal, vokasional dan tinggi
  - Sekolah tusyen dan sekolah muzik
  - Sekolah memandu
  - Gym dan fitness centre
  - Kemudahan sukan (indoor & outdoor)
  - Golf
  - Restoran, kafe dan food court
  - Gerai dan pasar

Keterangan lanjut mengenai pengurangan langkah-langkah penjarakan sosial di setiap premis tersebut di atas akan masing-masing dijelaskan oleh Kementerian yang berkenaan.

5. Sementara itu, berikut ialah syarat-syarat pengurangan langkah-langkah sosial bagi aktiviti-aktiviti tertentu:
  - a. Bermula 17 Ogos 2020, perkumpulan ramai adalah dibenarkan dengan keramaian tidak melebihi 200 orang sahaja. Orang ramai boleh merujuk kepada syarat-syarat terperinci di dalam Garispanduan bagi Perkumpulan Ramai Tahap 3 yang akan dimuat naik ke laman web Kementerian Kesihatan.
  - b. Arked dan taman permainan kanak-kanak (*indoor and outdoor*) akan dibenarkan beroperasi pada kadar 60% dari kapasiti biasa pada satu-satu masa. Garispanduan bagi Arked dan Taman Permainan Kanak-Kanak Tahap 2 akan dimuat naik ke laman web Kementerian Kesihatan.

6. Sehubungan dengan ini, Kementerian Kesihatan ingin memberikan peringatan bahawa orang ramai adalah dikehendaki untuk mematuhi segala peraturan dan arahan yang berkaitan dengan pengurangan langkah-langkah penjarakan sosial tersebut. Sesiapa yang didapati melanggar atau ingkar akan mana-mana arahan yang telah dikeluarkan maka ianya adalah menjadi satu kesalahan di bawah Akta Penyakit Berjangkit (Penggali 204) yang mana jika didapati bersalah boleh dikenakan denda kompaun sehingga \$5,000 atau boleh didakwa ke mahkamah yang membawa denda sehingga \$10,000 atau penjara sehingga tempoh 6 bulan atau kedua-duanya sekali. Kementerian ini tidak akan teragak-agak untuk mengambil tindakan undang-undang terhadap sesiapa yang tidak mematuhi arahan-arahan yang telah dikeluarkan.
  
7. Sementara itu, pada menjunjung titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Kementerian Kesihatan seterusnya ingin memaklumkan kepada orang ramai mengenai pengurangan harga bayaran caj ujian swab RT-PCR COVID-19

yang dikenakan kepada warga asing yang diberikan kebenaran khas untuk masuk ke negara ini iaitu daripada **\$1,000 (seribu ringgit)** kepada **\$350 (tiga ratus lima puluh ringgit)** bermula pada esok, hari Jumaat, 14 Ogos 2020.

8. Kementerian Kesihatan akan terus memantau situasi wabak di dalam negara serta di peringkat serantau dan global serta melaksanakan penilaian risiko secara berterusan bagi mempertimbangkan pengurangan langkah-langkah seterusnya. Jika situasi wabak kembali membimbangkan, Kementerian Kesihatan tidak akan teragak-agak untuk memperketatkan semula langkah-langkah penjarakan sosial yang perlu dilaksanakan untuk mengawal wabak tersebut. Kementerian Kesihatan akan memaklumkan kepada orang ramai mengenai sebarang perubahan mengenai situasi ini, jika perlu dari masa ke masa.
9. Kementerian Kesihatan juga ingin menekankan dan mengingatkan kepada orang ramai untuk terus meneruskan mematuhi segala arahan yang dikeluarkan oleh pihak Kerajaan

serta mengamalkan tanggungjawab sosial masing-masing dengan mengamalkan kebersihan diri, etika bersin yang betul, digalakkan memakai sungkup muka (*face mask*) apabila berada di tempat-tempat awam yang penuh sesak dan jika merasa kurang sihat, tidak menghadirkan diri ke tempat-tempat awam dan majlis-majlis keramaian.

10. Disamping itu, orang ramai juga digalakkan untuk menggunakan aplikasi BruHealth dan mengimbas kod QR setiap kali apabila masuk dan keluar dari premis-premis terutama sekali di tempat-tempat awam seperti gedung-gedung perniagaan, kedai-kedai runcit, restoran-restoran, establishmen kecantikan, kedai gunting dan lain-lain. Oleh yang demikian, pengurus-pengurus premis berkenaan adalah dinasihatkan untuk mencetak dan memaparkan QR kod di tempat-tempat masuk masing-masing. Orang ramai juga disyorkan untuk mengambil serius dalam penggunaan aplikasi BruHealth terutama sekali dalam mengimbas QR kod ini kerana ianya adalah penting bagi Kementerian Kesihatan dalam membuat pengesanan kontak (*contact tracing*) jika berlaku sebarang penularan jangkitan. Sehubungan dengan ini, jika orang ramai



mempunyai sebarang masalah dalam penggunaan applikasi BruHealth adalah dinasihatkan untuk menghubungi talian 148 pada waktu bekerja (*office hours*) ataupun melalui emel [bruhealth.support@moh.gov.bn](mailto:bruhealth.support@moh.gov.bn) dan [askhal@moh.gov.bn](mailto:askhal@moh.gov.bn) .

11. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu [www.moh.gov.bn](http://www.moh.gov.bn) atau menghubungi Talian Nasihat Kesihatan 148 atau melalui aplikasi [healthinfo.gov.bn](http://healthinfo.gov.bn).

- TAMAT -

Rujukan : KK/PR/2

Tarikh : 22 Zulhijjah 1441H / 13 Ogos 2020